

faiët cognoistre la sterilité de la terre & qu'on n'en pourroit à peine tirer aucun profit. Il y a seulement un petit iardin deuant la rade, en lieu un peu esleué, que les Mattelots cultiuent quand ils sont là arriuez, & y sement de l'ozeille & autres petites herbes, qui leur seruent à faire du potage, en faisant leur pesche & la seicherie de moluës sur le gallay.

Ce qu'il y a de plus commode & consolatif après la pesche & la chasse, qui y est mediocrement bonne, est un beau ruisseau d'eau douce, || tres-bonne à boire, 147 qui se descharge au port dans la grand mer, de dessus les hautes montagnes qui sont à l'opposite, sur le sommet desquelles me promenant par fois, pour contempler de l'autre costé l'embouchure du grand fleuve S. Laurens, par où nous deuions passer pour Tadoussac, i'y vis quelques lapins & perdrix, comme celles que i'ay veuës du \* depuis dans le país des Hurons: & comme ie desirois m'employer tousiours à quelque chose de pieux & qui me fournit d'un renouvellement de ferueur à la poursuite de mon dessein, ne pouuans planter d'autres Croix, i'en grauois avec la pointe d'un cousteau dans l'escorce des plus grands arbres, avec des noms de IESUS, pour marque que nous prenions possession de ceste terre au nom de Iesus-Christ nostre Maistre, ou le seul & vray Dieu seroit dorefnauant adoré.

Nos gens ayans mis ordre à toutes leurs affaires & disposé un grand eschafaut pour la pesche de la moluë qu'ils auoient hautement pris sur un particulier pescheur arriué le premier, ils laisserent nostre Nauire au port pour leur seruir, & nous embarquames dans